

光緒重修安徽通志

重修安徽通志卷一百七十七

人物志

名賢

舊志謂安徽山川融結扶輿清淑之氣代有所鍾然自周漢至我

聖朝道光之初所志安徽名賢僅十有八人而此十八人中惟閔子受學聖門朱子發明聖道張英事

聖祖仁皇帝三十餘年得與見知之列其次若管仲蹇叔文翁朱邑召信臣桓榮范滂劉宏包拯呂公著汪立信左光斗霸才循吏經生節義忠清之士也史稱李紳暴刻吳淵嚴酷猶取其節操才具又其次也至老子非今亳州人江南通志已詳辯之所當刪正者也李天馥爲政持大體方苞秉經守禮學問湛深今並補

著於篇曹振鏞歷事

三朝

列聖鑒其忠孝

宣宗稱爲股肱心膂之臣深倚賴而人不知曹與張蓋後先輝映矣述

人物志名賢傳

周管仲夷吾者潁上人也

韋昭云管夷吾姬姓之後管嚴之子敬仲也補按管氏名夷吾字仲諡曰

敬管嚴卽管莊仲山也見索隱引世本

少時常與鮑叔牙遊鮑叔知其賢善遇之

已而鮑叔事齊公子小白管仲事公子糾及小白立公子糾死

管仲囚焉鮑叔遂進管仲管仲既用任政於齊桓公以霸九合

諸侯一匡天下以區區之齊在海濱通貨積財富國強兵與俗

同好惡故其稱曰倉廩實而知禮節衣食足而知榮辱上服度

則六親固四維不張國乃滅亡下令如流水之源令順民心故

論卑而易行俗之所欲因而予之俗之所否因而去之其爲政也善因禍而爲福轉敗而爲功貴輕重慎權衡桓公實怒少姬南襲蔡管仲因而伐楚責包茅不入貢於周室桓公實北征山戎管仲因而令燕修召公之政柯之會桓公欲背曹沫之約管仲因而信之諸侯由是歸齊

史記本傳

管子八十六篇在道家

漢書藝文

志七略云十八篇在法家

蹇叔鉅人秦之賢大夫也先是秦繆公投百里奚以國政讓曰臣不及臣友蹇叔蹇叔賢而世莫知臣常遊困於齊而乞食鉅

人

徐廣曰鉅一作鉅張守節曰鉅地名在沛縣

蹇叔收臣臣欲事齊君無知蹇叔止

臣得脫齊難遂之周王子頹欲用臣蹇叔止臣遂得免誅事虞君蹇叔止臣臣不用其言遂及於難是以知其賢於是繆公使人厚幣迎蹇叔以爲上大夫繆公將襲鄭蹇叔不可公曰子不

知也遂使百里奚子孟明視蹇叔子西乞術及白乙丙將兵行果敗於殽三將皆爲晉所虜及晉許歸三帥繆公素服郊迎嚮師而哭曰孤違蹇叔以辱三子作秦晉其篇中所謂一个臣蓋指蹇叔也

史記秦本紀史記正義

閔子名損字子騫

鄭康成目錄云魯人家語云齊人

少孔子十五歲不仕大夫

不食汗君之祿

史記

唐開元八年從祀孔子廟宋祥符元年封費

國公

國朝康熙四十四年

聖祖仁皇帝賜額曰德行之科遣江南學政內閣學士張廷樞懸宿州

閔子祠俾裔孫之在宿者世奉祠祭

宿州志

按四庫目錄云閔子本宿人春秋時宿屬青州爲齊地故家

語以爲齊人

舊通志

漢文翁廬江舒人少好學通春秋以郡縣吏察舉景帝末爲蜀郡守仁愛好教化見蜀地辟陋欲誘進之選郡小吏開敏有材者張叔等十餘人遣詣京師受業博士或學律令減省少府用度買刀布蜀物齎計吏以遺博士數歲蜀生皆成就還歸文翁以爲右職用次察舉官有至郡守刺史者又修起學宮於成都市中招下縣子弟以爲學官弟子爲除更繇高者以補郡縣吏次爲孝弟力田常選學官僮子使在便坐受事每出行縣益從學官諸生明經飭行者與俱使傳教令出入閭閻見者榮之爭欲爲學官弟子富人至出錢以求之繇是大化蜀地學於京師者比齊魯焉至武帝時乃令天下郡國皆立學校官自文翁爲之始云文翁終於蜀吏民爲立祠堂歲時祭祀不絕

漢書本傳

朱邑字仲卿廬江舒人少爲舒桐鄉嗇夫廉平不苛以愛利爲

行未嘗咎辱人存問耆老孤寡遇之有恩吏民愛敬焉遷太守  
卒史舉賢良爲大司農丞遷北海太守以治行第一入爲大司  
農公正不可交以私貢薦賢士大夫多得其助者居處儉節祿  
賜以其九族鄉黨神爵元年卒下詔稱揚賜邑子黃金百斤以  
奉祭祀初邑病且死屬其子曰我故爲桐鄉吏其民愛我必葬  
我桐鄉後世子孫奉嘗我不如桐鄉民其子葬之桐鄉西郭外  
民果共爲起家立祠歲時祭祀至今不絕

漢書本傳

召信臣字翁卿九江壽春人以明經甲科爲郎出補穀陽長舉  
高第遷上蔡長其治視民如子超爲零陵太守病歸復徵爲諫  
大夫遷南陽太守信臣勤力有方略好爲民興利務在富之時  
行視郡中水泉開通溝瀆起水門隄閘凡數十處以廣灌溉多  
至三萬頃作均水約束刻石田畔以防分爭禁止奢靡斥罷游

赦吏民親愛號曰召父賜黃金四十斤遷河南太守治行第一  
竟甯中徵爲少府列於九卿卒於官元始四年詔祀百辟卿士  
有益於民者歲時郡二千石率屬官行禮奉祠信臣豕而南陽  
亦爲立祠

漢書本傳

桓榮字春卿沛郡龍亢人少習歐陽尙書事博士九江朱普十  
五年不窺家園普卒榮奔喪九江因留教授王莽亂榮抱其經  
書與弟子逃匿山谷講論不輟顯宗立爲太子選求明經以榮  
弟子何湯言帝卽召榮令說尙書甚善之拜爲議郎使授太子  
每朝會輒令榮於公卿前敷奏經書拜爲博士車駕幸太學會  
諸博士論難於前榮溫恭蘊藉辨明經義儒者莫及常令止宿  
太子宮侍講拜爲少傅賜以輜車乘馬榮大會諸生陳其車馬  
印綬曰今日所蒙稽古之力也建武三十年拜爲太常顯宗卽



位尊以師禮乘輿常幸太常府令榮坐東面設几杖天子親自

執業永平二年三雍初成拜榮爲五更封爲關內侯及卒帝變

服臨喪送葬賜冢塋於首山之陽

後漢書本傳

范滂字孟博汝南征羌人

謝承書曰汝南細陽人案細陽今太和縣是

少厲清節爲

州里所服舉孝廉光祿四行時冀州饑荒盜賊羣起以滂爲清

詔使案察之登車視轡慨然有澄清天下之志及至州境守令

自知臧汙望風解印綬去遷光祿勳主事棄官歸復爲太尉黃

瓊所辟後詔三府掾屬舉謠言滂奏刺史二千石權豪之黨二

十餘人尙書責滂所劾猥多疑有私故滂對曰農夫去草嘉穀

必茂忠臣除姦王道以清若臣有二三受顯戮滂觀時艱知意

不行因投劾去太守宗資聞其名請署功曹委任政事嚴整疾

惡其有行違孝悌不軌仁義者皆掃跡斥逐顯薦異節抽拔幽

陋中人以下莫不歸怨乃指滂之所用以爲范黨後牢修誣言  
鈞黨滂坐繫黃門北寺獄獄吏謂曰凡坐繫皆祭臬陶滂曰臬  
陶古之直臣知滂無罪將理之於帝如其有罪祭之何益獄吏  
將加掠考滂以同囚多嬰病乃請先就格與同郡袁忠爭坐楚  
毒桓帝使中常侍王甫以次辨詰滂忠越次而進王甫詰曰君  
爲人臣不推忠國而共造部黨諸所謀結並欲何爲滂曰臣聞  
仲尼之言見善如不及見不善如探湯欲使善善同其清惡惡  
同其汙謂王政之所願聞不悟更以爲黨甫曰卿更相拔舉迭  
爲唇齒有不合者見則排斥其意如何滂乃慷慨仰天曰古之  
循善自求多福今之循善身陷大戮身死之日願埋滂於首陽  
山側上不負皇天下不愧夷齊甫愍然改容乃得並解桎梏事  
釋南歸汝南南陽士大夫迎之者數千兩同囚鄉人殷陶黃穆

亦免俱歸並衛侍於傍應對賓客滂謂之曰今子相隨是重吾禍也遂邂逅鄉里初滂等繫獄尙書霍諝理之及得免往候諝而不謝或讓之對曰叔向嬰罪祁奚救之未聞羊舌有謝恩之辭祁老有自伐之色建甯二年大誅黨人詔下急捕滂等督郵吳導至縣抱詔書閉傳舍伏牀而泣滂聞曰必爲我也卽自詣獄縣令郭揖大驚出解印綬引與俱亡滂曰死則禍塞何敢以罪累君又令老母流離乎其母就與之訣滂白母曰仲博孝敬足以供養仲博滂弟也滂從龍舒君歸黃泉謝承書曰滂父顯故龍舒侯相也惟大人割不忍之恩勿增感戚母曰汝今得與李杜齊名死亦何恨既有令名復求壽考可兼得乎滂拜受教顧謂其子曰吾欲使汝爲惡則惡不可爲使汝爲善則我不爲惡行路聞之莫不流涕

時年三十三

後漢書本傳

晉劉宏字和季沛國相人有幹略政事之才起家太子門大夫累遷甯朔將軍假節監幽州諸軍事甚有威惠寇盜屏跡以勳德兼茂封宣城公太安中張昌作亂轉使持節南蠻校尉荊州刺史討昌自方城至宛新野所向皆平進鎮南將軍都督荊州諸軍事遣軍討昌斬之時荆部守宰多闕宏請補選帝從之乃敘功銓德隨才補授甚爲論者所稱於是勸課農桑寬刑省賦歲用有年百姓愛悅舊制峴方二山澤中不聽百姓捕魚宏下教曰禮名山大川不封與其利今公私兼并百姓無復厝手地當何謂耶其速改此法益州刺史羅尙爲李特所敗遣使告急請糧宏移書贍給州府綱紀以運道懸遠文武匱乏欲以米五千斛與之宏曰天下一家彼此無異遂以零陵米三萬斛給之論平張昌功應封次子一人縣侯上疏固讓許之進拜侍中

鎮南大將軍開府儀同三司惠帝時天下亂宏專督江漢威行南服前廣漢太守羊冉說以縱橫之事宏大怒斬之陳敏寇揚州引兵欲西上乃解南蠻以授蔣超統江夏太守陶侃等屯於夏口侃與敏同郡同歲舉吏有閒之者宏不疑之以侃爲前鋒督護委以討敏之任侃遣子及兄子爲質宏遣之曰賢叔征行君祖母年高便可歸也匹夫之交尚不負心何況大丈夫乎永興三年詔進號車騎將軍餘官如故宏每有興廢手書守相丁甯款密人皆感悅咸曰得劉公一紙書賢於十部從事及東海王越奉迎大駕宏遣劉盤率諸軍會之自以老疾將解州及校尉分授所部未及表上卒於襄陽士女嗟痛若喪所親宏卒司馬郭劭欲推成王穎爲主宏子璠討勸斬之東海王越表贈

宏新城郡公諡曰元

晉書本傳

唐李紳字公垂亳州譙人中書令敬元之曾孫也六歲而孤哀  
等成人母盧躬授之學於詩最有名葬母有烏銜芝墜轎車元  
和初擢進士第補國子助教去客金陵李錡辟掌書記錡寢不  
法紳數諫不入欲去不許會朝廷遣使召錡錡矜使者爲眾奏  
畱召紳作疏紳佯怖栗不能成字下筆輒塗去盡數紙錡罵之  
曰不憚死耶卽對曰得死爲幸怒而囚之錡誅乃免或欲以聞  
謝曰本激於義非市名也久之穆宗召爲右拾遺翰林學士累  
擢中書舍人遷御史中丞敬宗卽位爲李逢吉所陷貶端州司  
馬紳南逐歷封康閒惴灑險澀惟乘漲流乃濟康州有媼龍祠  
紳以書禱俄而大漲後天子感悟得徙江州長史遷滁壽二州  
刺史霍山多虎擷茶者病之治機弁發民迹射不能止紳至盡  
去之虎不爲暴以太子賓客分司東都開成初爲河南尹河南

多惡少危帽散衣擊毬官道車馬不敢前紳治剛嚴皆望風遜去遷宣武節度使大旱蝗不入境武宗卽位徙淮南召拜中書侍郎同中書門下平章事進尚書右僕射門下侍郎封趙郡公居位四年以足緩辭位以檢校右僕射平章事復節度淮南卒

贈太尉諡文肅

唐書本傳

宋包拯字希仁廬州合肥人始舉進士除大理評事出知建昌縣以父母老辭官歸養後數年親繼亡廬墓終喪猶徘徊不忍去久之赴調知天長縣徙知端州端產硯前守緣貢率取數十倍以遺權貴拯命製者才足貢數歸日不持一硯改監察御史使契丹契丹令典客謂拯曰雄州新開便門乃欲誘我叛人以刺疆事耶拯曰涿州亦嘗開門矣刺疆事何必開便門哉其人遂無以對歷三司戶部副使奏罷秦隴斜谷務造船材木及七

洲出賦河橋竹索數十萬契丹聚兵近塞邊郡稍警命往河北  
調發軍食拯以邢洺趙三州民田萬五千頃率用牧馬請悉以  
賦民從之經度解州鹽法一切通商除天章閣待制知諫院數  
論斥權倖大臣請罷一切內除曲恩又列上唐魏鄭公三疏願  
置之坐右以爲龜鑑又上言天子當明聽納辨朋黨惜人才不  
主先入之言凡七事朝廷多施行之除龍圖閣直學士河北都  
轉運使請罷河北屯兵分之河南諸郡借戍兵不可遽減請訓  
練義勇少給餼糧不報徙知瀛州揚州廬州池州江甯府召權  
知開封府遷右司郎中立朝剛毅貴戚宦官爲之斂手聞者皆  
憚之人以其笑比黃河清童稚婦女亦知其名呼曰包待制京  
師爲之語曰關節不到有閻羅包老舊制凡訟訴不得徑造庭  
下拯開正門使得至前陳曲直吏不敢欺中官勢族築園榭侵



惠民河以故河塞拯悉毀去遷諫議大夫權御史中丞奏乞豫  
建太子仁宗曰卿欲誰立對曰臣爲萬世計也陛下問欲誰立  
是疑臣也臣年近七十且無子非邀後福者帝喜曰徐當議之  
以樞密直學士權三司使凡諸筦庫供上物舊皆科率外郡拯  
爲置場和市民得無擾遷給事中拜樞密副使遷禮部侍郎辭  
不受尋以疾卒年六十四贈禮部尙書諡孝肅有奏議十五卷

宋史  
本傳

呂公著字晦叔壽州人幼嗜學父夷簡器異之登進士第通判  
潁州郡守歐陽修與爲講學之友判吏部南曹仁宗嘉其恬退  
英宗親政爲龍圖閣直學士方議追崇濮王或欲稱皇伯考公  
著曰此眞宗所以稱太祖豈可施於王及下詔稱親且班諱又  
言稱親則有二父之嫌王諱但可避於上前不應與七廟同諱

呂晦等坐論濮王去公著言屢紕言者何以風示天下不聽遂乞補外出知蔡州神宗立召爲翰林學士知銀臺司司馬光以論事罷中丞還經幄公著封還其命熙甯初知開封府時淫雨地震上疏請遠佞人二年爲御史中丞王安石方行青苗法公著極言之安石怒其深切帝使舉呂惠卿爲御史公著曰惠卿固有才然奸邪不可用安石愈怒誣以惡語出知潁州召還遷翰林學士承旨改端明殿學士知審官院未幾同知樞密院事有欲復肉刑者議取死囚試劓刑公著曰試之不死則肉刑遂行矣乃止夏人幽其主將大舉討之公著曰問罪之師當先擇帥苟未得人不如勿舉及兵興秦晉民力大困元豐五年以疾乞去位除資政殿學士定州安撫使俄永樂城陷帝臨朝歎曰邊民疲弊如此獨呂公著爲朕言之耳徙揚州加大學士將立

太子帝謂輔臣當以呂公著司馬光爲師傅哲宗卽位以侍讀  
還朝太皇太后遣迎問所欲言公著曰先帝本意以寬省民力  
爲先而建議者以變法侵民爲務誠得中正之士講求天下利  
病協力而爲之宜不難矣至則陳十事曰畏天愛民修身講學  
任賢納諫薄斂省刑去奢無逸又乞備置諫員以開言路拜尙  
書左丞門下侍郎元祐元年拜尙書右僕射兼中書侍郎與司  
馬光同心輔政推本先帝之志凡欲革而未定者一一舉行之  
民謐呼鼓舞咸以爲便光薨獨當國除吏皆一時之選科舉罷  
詞賦專用王安石經義公著始令參用古今諸儒之說且禁主  
司以老莊書命題復賢良方正科吐蕃首領鬼章青宜結久爲  
洮河患聞朝廷弭兵省戍陰與夏人謀取熙岷公著遣游師雄  
以便宜諭諸將不逾月生致於闕下帝出所書唐人詩分賜近

臣公著乃集所講書要語明白切於治道者凡百篇進之以爲聖學之助三年四月懇辭位拜司空同平章軍國事宋興以來宰相以三公平章軍事者四人公著與父居其二士豔其榮明年二月薨年七十二太后深痛閔之帝亦悲感親臨賜奠贈太師申國公諡曰正獻御書碑首曰純誠厚德始與王安石善安石兄事之安石博辯騁辭人莫敢抗公著獨以精識約言服之安石嘗曰疵吝每不自勝一詣長者卽廢然反後安石得志意其必助己而數以公議列其過失以故交情不終於講說尤精語約而理盡司馬光曰每聞晦叔講便覺己語爲煩其爲名流所敬如此

宋史本傳

朱熹字元晦一字仲晦徽州婺源人司勳吏部郎松之子也始就傅授以孝經一閱題其上曰不若是非人也嘗從羣兒戲沙

上獨端坐以指畫沙視之八卦也中紹興十八年進士第除泉州同安簿選邑秀民充弟子員日與講說聖賢修己治人之道禁女婦之爲僧道者孝宗卽位應詔上封事首言帝王之學必先格物致知以極夫事物之變則自然意誠心正而可以應天下之務次言修攘之計不時定者講和之說誤之次言四海利病係斯民之休戚斯民休戚係守令之賢否監司者守令之綱朝廷者監司之本也本原之地不可以不加意隆興元年復召入對其一言大學之道在乎格物以致其知其二言君父之讐不與共戴天湯思退洪适繼相皆主和議論不合歸屢召不起淳熙五年除知南康軍再辭不許至郡興利除害值歲不雨講求荒政多所全活閒詣郡學引進士子與之講論訪白鹿洞書院遺址奏復其舊爲學規俾守之明年夏大旱詔條具民間利

病遂上疏言恤民之本在人君正心術以立紀綱不報旋錄救  
荒之勞除直祕閣會浙東大饑宰相王淮奏改提舉浙東常平  
茶鹽公事入對陳七事上爲動容始拜命卽移書他郡募米商  
蠲其征及至則客舟之米已輻輳日按行境內鉤訪民隱郡縣  
官吏憚其風采至自引去政有不便於民者悉釐革之上謂王  
淮曰朱某政事卻有可觀時鄭丙詆程氏之學以陰阻之遂乞  
奉祠周必大相除提點江西刑獄以疾辭不許遂行有要之於  
路以爲正心誠意之論上所厭聞戒之勿言答曰吾生平所學  
惟此四字豈可隱默以欺吾君乎及召對上曰浙東之事朕自  
知之今當處卿清要不復以州縣相煩也翼日除兵部郎官以  
足疾旬祠本部侍郎林栗以論易西銘不合力詆其僞栗雖坐  
黜亦允其辭除直寶文閣主管嵩山崇福宮投匭進封事言天

下之大本與今日之急務大本者陛下之心急務則輔翼太子  
選任大臣振舉綱紀變化風俗愛養民力修明軍政六者是也  
疏入上已就寢亟起秉燭讀之明日除主管太一宮兼崇政殿  
說書力辭除祕閣修撰奉外祠光宗卽位降詔獎諭除江東轉  
運副使改知漳州奏除屬縣無名之賦七百萬減經總制錢四  
百萬以俗未知禮采古喪葬嫁娶之儀命父老以教子弟禁男  
女聚僧廬爲傳經會史浩入見請收天下人望乃除祕閣修撰  
主管南京鴻慶宮再辭詔諭撰之職以寵名儒乃拜命未幾差  
知潭州力辭有旨長沙巨屏得賢爲重遂行會洞獠擾屬郡論  
以禍福皆降之興學校明教化四方學者畢至甯宗卽位趙汝  
愚首薦除煥章閣待制侍講每以所講編次以進上亦開懷容  
納又奏勉上進德斥左右竊柄之失惕然以韓侂胄用事爲慮

既屢爲上言又數以手書啟汝愚有防微杜漸之語汝愚方以  
其易制不以爲意慶元元年汝愚以誣逐權歸侂冑矣二年沈  
繼祖誣以十罪詔落職罷祠四年以年近七十申乞致仕五年  
依所請明年卒年七十一自登第五十年仕於外者九考立朝  
纔四十日此後僞學之禁甚嚴嘉泰初稍弛二年詔除華文閣  
待制與致仕恩澤諡曰文昇贈中大夫特贈寶謨閣直學士理  
宗寶慶二年贈太師追封信國公改徽國紹定末祕書郎李心  
傳乞與司馬光周敦頤邵雍張載程顥程頤列於從祀不報淳  
祐元年正月上視學手詔與周張二程同從祀孔子廟

宋史本傳

國朝康熙五十一年

特旨升列十哲之次

一統志

吳淵字道夫宣州人

補按舊志作宣城今依宋史吳柔勝傳更正又甯國縣志據宋史吳潛傳及一統志



作富 國人祕閣修撰柔勝子也五歲喪母哀慕如成人嘉定七年舉  
進士調建德縣主簿時開化新置尉丞相史彌遠欲以處淵對  
曰甫得一官何敢躁進彌遠改容不復強丁父憂詔起復力辭  
不許復辭且貽書政府曰人道莫大於事親事親莫大於送死  
言哀求榮大節掃地何以事君時丞相史嵩之方起復或曰語  
得無礙乎淵不顧服除知武陵縣改揚子入爲將作監再遷祕  
書丞出知平江府兼節制許浦水軍提點浙西刑獄衢盜起淵  
遣將士捕之殲其渠魁散其支黨以功累進右文殿修撰適政  
府欲用兵中原淵力陳其不可出知江州未幾邊事果如淵言  
改知鎮江府定防江軍之擾遷太府少卿進權工部侍郎以寶  
章閣直學士知太平州尋兼江東轉運使兩淮民流徙入境者  
四十餘萬慰撫而賑濟之境內肅然升華文閣學士知隆興府

江西安撫使會歲大祲講行荒政全活者七十八萬九千餘人  
加敷文閣學士改知鎮江歲亦大祲因淵全活者又六十五萬  
八千餘人丁母憂服除進龍圖閣學士知江州尋爲沿江制置  
副使兼提舉南康軍兵甲公事節制斬黃安慶屯田使湖南峒  
寇入江右境袁洪大震淵遣將調兵生擒其魁亂遂平遷兵部  
尙書知平江府兼浙西兩淮發運使歲又大祲因淵全活者四  
十二萬三千餘人以功進端明殿學士知建康府兼行宮留守  
節制和州無爲軍安慶府兼三郡屯田使朝廷付淵以光豐斬  
黃之事凡勦司空山燕家山金剛臺三大砦嵯峨山鷹山什子  
山等二十二小砦團丁壯置軍分立隊伍星聯碁布詔以淵興  
利除害所列二十五事究心軍民拜資政殿大學士封金陵侯  
賜袞繡堂忠勤樓大字進爵爲公改知甯國府累辭旬祠提舉

洞霄宮起拜觀文殿學士總領湖廣江西京西財賦湖北京西軍馬錢糧調兵二萬往援川蜀力戰於白河阻河玉泉寶祐五年正月朔以功拜參知政事越七日卒贈少師

宋史本傳

汪立信新安汪澈從孫也會大父智從澈宣諭湖北道六安愛其山水遂家焉淳祐元年立信獻策招安慶劇賊胡興劉文亮等借補承信郎家宴甚吳淵守鎮江一見與語大奇之禮以上客試江東轉運司六年登進士第理宗見其狀貌雄偉顧侍臣曰此闔帥才也授烏江主簿歷通判建康府荆湖制置使趙葵辟充參議官葵去而馬光祖代之迎合賈似道以非理陷葵立信力爭之不聽遂投劾去景定元年知池州權知常州浙西提點刑獄卽嘉興治所講求荒政改知江州又遷鎮江尋充湖南安撫使知潭州至官供帳之物悉置官庫所積錢連歲代納潭

民夏稅貧病及雨雪旱潦皆有給興學校變士習以潭爲湖湘  
重鎮勦威敵軍所募精銳數千人後來皆賴其用權兵部尙書  
荆湘安撫制置知江陵府時襄陽圍急立信上疏請益安陸屯  
兵不報乃移書似道謂爲今之計其策有三盡出內郡兵置之  
江干以實外禦距百里而屯屯有守將十屯爲府府有總督選  
宗室親王忠良有幹用大臣立爲統制分東西二府互相應援  
以爲聯絡之固成率然之勢爲上策久拘聘使無益於我徒使  
敵得以爲辭請禮而歸之許輸歲幣以緩師期邊遽稍休藩垣  
稍固生兵日增可戰可守爲中策二策果不行則衝壁輿櫬之  
禮請備以俟立信目微眇似道得書大怒抵之地詬曰瞎賊狂  
言敢爾中以危法廢斥之咸淳十年元兵大舉伐宋似道督諸  
軍出次江上起立信爲端明殿學士沿江置制使江淮招討使

就建康募兵受詔不辭卽日上道與似道遇蕪湖似道哭曰不用公言以至於此立信曰瞎賊今日更說一句不得似道問何向曰某去尋一片趙家地上死第要死得分明爾旣至建康則守兵悉潰四面皆北軍乃率所部至高郵欲控引淮漢以爲後圖已而聞似道師潰江漢守臣望風降遜歎曰吾今日猶得死於宋土也迺召賓佐與訣手爲表起居三宮夜分起步庭中慷慨悲歌扼吭而卒以光祿大夫致仕遺表聞贈太傅愛將金明以立信之喪歸葬丹陽元相巴延入建康或以立信二策告請戮其孥巴延歎息久之曰宋有是人有是言哉使果用我安得至此子麟不肯降崎嶇走閩以死

宋史本傳

明左光斗字遺直桐城人萬曆丁未進士除中書舍人選授御史巡視中城捕治吏部豪惡吏獲假印七十餘假官百餘輦下

震悚出理屯田言北人不知水利因條上三因十四議詔悉允  
行水利大興北人始知藝稻光宗崩李選侍據乾清宮迫皇長  
子封皇后光斗上言內廷乾清宮猶外廷皇極殿選侍既非嫡  
母又非生母儼然尊居正宮將借撫養之名行專制之實武氏  
禍再見於今將有不忍言者時選侍欲專大權令廷臣箋奏先  
進乾清得光斗牋大怒將加嚴譴數召光斗光斗曰我天子法  
官非天子召不赴選侍益怒邀熹宗至乾清議之熹宗不肯往  
使取賤視之心以爲善趣擇日移宮光斗乃免當是時宮府危  
疑人情畏懼光斗與楊漣協心建議排闥奴扶冲主宸極獲正  
兩人力爲多朝野並稱爲楊左天啟初累擢左僉都御史是時  
正人咸居要地光斗與相得數爲危言覈論甄別流品而忌者  
浸不能容給事中傅樾疏劾光斗與汪文言比而爲姦光斗請

罷事得解楊漣劾魏忠賢光斗與其謀又與高攀龍共發崔呈秀贓私魏黨咸怒及忠賢逐趙南星高攀龍魏大中光斗憤甚草奏劾忠賢及魏廣微三十二斬罪忠賢詞知及其未上先二日假會推事與楊漣俱削籍羣小恨不已復構文言獄入光斗名遣使往逮父老子弟擁馬首號哭聲震原野至則下詔獄酷訊許顯純誣以受楊鎬熊廷弼賄坐贓二萬五日一追比與楊漣同日爲獄卒所斃時五年七月二十六日也年五十一忠賢既誅贈光斗右都御史錄其一子再贈太子少保福王時追諡

忠毅

明史本傳  
以上舊志

國朝李天馥字湘北合肥人順治戊戌進士授檢討康熙十一年遷司業累擢至內閣學士十六年雨澤愆期

特旨會同三法司詳鞠已結重案皆減等發落二十年擢戶部左侍郎

有以苞苴謁者拒之曰吾一日在部爾曹無望茲事之行也明年充會試副考官二十三年調吏部以激濁揚清爲己任充政治典訓副總裁二十七年擢工部尙書

上召總河靳輔巡撫于成龍面奏河工事宜兩人各執一說天馥會議以下河海口當開高家堰重隄宜停謂成龍言是

上從之調刑兵二部疏薦知縣陸隴其彭鵬邵嗣堯居官有聲轉吏部逐點吏曹部一清三十一年授

武英殿大學士明年丁母憂

御書貞松二大字賜之兼書一幅曰儒者當學探本原行迪純茂循序進德守己冲虛一言一動罔有不謹嘉謀嘉猷必以入告斯廣譽翕然爲周行之士出都後一日

上曰李天馥侍朕三十餘年未嘗有失三年易過此官不必補也葬廬



墓側手植松楸淚血沾漬墓門服闋起入閣視事充

平定朔漠方略總裁天馥老成清慎處心虛公嘗謂變法不如守法救弊未必無弊奉行成憲不敢易尺寸乃所以報國也故其爲政持大體有古大臣風三十八年卒

賜祭葬諡文定

一統志 舊志  
宜績 新移

張英字敦復桐城人康熙丁未進士入翰林侍

講幄敷陳經義民生吏治悉心獻納知無不言

聖朝初設南書房俾每日侍直以資講論詞臣

賜第內城自此始及佐樞部掌邦禮恪慎清粹一時典章儀制

廟廷制誥之文多其手定洎登相位忠盡純誠佐佑啟沃歷任三十餘

年未嘗一日離內直

聖祖稱其老成敬慎終始不渝有古大臣風嘗

命工寫像以賜生平多隱德外和內剛一私不染薦拔賢俊如不及未嘗使其人知又廣義田以贍宗族肅家範以率子弟一門感勵名節溫恭謙謹稱江左第一家風學問醇博所著有易書衷論及存誠堂篤素堂文集康熙四十年冬

卒告回籍四十七年卒於家年七十二

御祭恤葬逾恆制諡曰文端

世宗憲皇帝御極之初有甘盤舊學之思

贈太子太傅崇祀京城賢良祠復

賜祭於本籍又

御書祠宇扁額有忠純詒範師模如在之

哀恩禮之渥罕有倫比

一統志 江南  
通志 舊志

方苞字靈皋桐城人上元籍康熙丙戌進士未

廷試聞母疾遽歸旋丁父憂五十年以戴名世案論斬蒙

恩赦宥隸旗籍

命直南書房蒙養齋恭校

御製樂律算法諸書

世宗登極加恩出旗籍假歸葬母還授左中允洊升內閣學士

命教習庶吉士充一統志總裁

高宗嗣位方欲追踐古禮行三年喪

詔羣臣議苞欲復古人以次變除之制具條其議禮部尙書魏廷珍上

之格不行乾隆元年

命選有明興

國朝制藝疏陳地丁四月完半之害請復舊制又言歲饑當令有

司得發倉粟平糶勿拘常制又言河南祥符等五十州縣自改

折銀徵本色民因不支請應折徵官爲采買俱下部議行又疏請凡遇水旱五六月卽當實報七月中卽核分數災重者動帑金舉要工壯者以工代賑老弱計口授食則易周而可久又疏陳食貨豐耗之故應飭官司督民樹畜令紳士籌開水利以裕其源禁燒酒種菸禁米出洋以節其流二年遷禮部右侍郎請矯除積習興起人才求

主上勤心以察依類以求按實積久以磨礱之信賞必罰以勸懲之誥尤切至四年以事落職

命在三禮館修書周官義疏成

上畱覽發刻七年以衰病乞解書局

賜侍講銜致仕歸十四年卒於家年八十二苞事親至孝學務篤實解經之書莫不詳究其說經皆推衍程朱之緒尤致力於春秋三

禮其文嚴於義法非闡道翼教有關人倫風化不苟作至今言  
古文者多宗之所著有周官辨周官集注周官析疑禮記析疑  
喪禮或問儀禮析疑春秋通論春秋直解春秋比事目錄左傳  
義法舉要及望溪文集又刪定管子荀子史記注補正離騷正  
義刪定通志堂宋元經解而奉

命所纂之書不與焉

舊志儒林茲采年譜及  
先正事略增修並移

咸豐初年巡撫蔣文慶

題准祀鄉賢祠

祀典後實  
新增

曹振鏞字儂笙歙縣人尚書文垣子乾隆辛丑進士歷官至大  
學士居相位凡二十二年卒年八十一其在乾隆時由編修超  
擢侍講督學河南

高宗稱其聲名甚好嘉慶三年以詹事督學廣東父憂歸服除祖母歿

期年始來京補官

仁宗稱其孝以通政使充

實錄館總纂尋充副總裁十二年以工部尚書充正總裁

高宗純皇帝實錄告成加太子少保十八年以吏部尚書協辦大學士

甫五日補

體仁閣大學士

賈平定滑城功以振鏞職任綸扉晉太子太保自十九年七月至二十五年七月

仁宗謁

陵六次秋獮木蘭五次皆

命留京辦事

宣宗御極簡任軍機大臣充

實錄館監修總裁官恭理喪儀道光元年

仁宗睿皇帝奉安禮成恭題

神主晉太子太傅三年

賜宴玉瀾堂繪像爲十五老臣之一

御賜詩句云絲綸佐朕彌恭謹抒忠獻替資劬勩四年

仁宗睿皇帝實錄告成

賞戴孔雀翎七年以喀什噶爾用兵襄贊機務夙夜勤勞

硃諭晉太子太師八年生擒首逆張格爾捷音至

硃諭晉加太傅賞用紫韁四月圖像

紫光閣

御製軍機大臣像贊并序曰西陲用兵諸臣夙夜在公盡心盡力與朕  
同一憂勤而曹振鏞公正慎勤班聯領袖尤能殫心掾實鉅細無遺  
御製贊曰親政之初先進正人密勿之地心腹之臣問學淵博獻替精

醇克勤克慎首掌絲綸十一年

上五旬萬壽加恩臣工以振鏞並無處分

賞戴雙眼花翎十四年

宣宗恭謁

西陵

命留京辦事十五年正月以疾卒於位

諭曰大學士曹振鏞服官五十餘年歷事

三朝年躋八袞因疾請假派員存問優加慰勞詎意數日遽成長往頓失腹心之臣不覺聲淚俱下悼惜難堪著加恩入祀賢良祠朕於本月二十九日親臨賜奠又

諭曰朕親政之初見大學士曹振鏞人品端方學問優長特授爲軍機大臣用資啟沃十四年餘靖恭正直歷久不渝雖身躋崇要小心謹



恪動循矩法從未稍蹈愆尤凡所陳奏均得大體老成持重懋著忠勤實朕股肱心膂之臣從前乾隆年間大學士劉統勳嘉慶年間大學士朱珪仰蒙

皇祖高宗純皇帝

皇考仁宗睿皇帝鑒其忠節

賜諡文正易名之典備極優隆曹振鏞實心任事體用兼優外貌訥然而獻替不避嫌怨朕深倚賴而人不知揆諸諡法實足以當正字而無愧著賜諡文正用副朕眷懷良輔寵錫嘉名至意並准其入祀賢良祠

命惠郡王前往賜奠靈柩起程回籍

命御前侍衛道慶前往奠醊到籍

賜祭葬如例初振鏞六十生日

仁宗御書綸閣延暉扁額謹以名其詩文曰綸閣延暉集又有話雲軒

詠史詩

史館抄傳  
行狀

新修

重修安徽通志卷一百七十八

人物志

宦績一

舊志他省人官安徽有治狀者曰名宦傳在職官安徽人官他省有治狀者曰宦績傳在人物然如朱邑陳眾包拯宦歷本郡及近世教職官於本省則列治狀於人物而表姓名於職官其有官職治狀而載於名賢忠節儒林文苑武功中者則以論定生平舉其所重與所長而治狀亦自不沒也自漢唐以來至我聖朝道光之初文通武達具載舊志未載者今並增補重複者分別刪存偶未檢者如河南呂蓋誤列宛陵闢黨潘汝楨濫躋方左之類概就刊削益以道光以後之政聲卓著者廣續之俾方來

矜式副

聖天子棫樸官人之盛焉述人物志宦績傳

安慶府

吳陳修廬江松滋人偏將軍武之子也幼有父風年十九孫權召見拜別部司馬授兵五百人時諸將新兵多有逃叛而修撫循皆得其意不失一人權奇之拜爲校尉後追錄功臣之後封都亭侯爲解煩督

三國志本傳

陳表字文興武之庶子修之弟也少知名與諸葛恪等並侍東宮徙太子中庶子拜翼正都尉兄修亡後表母不肯事修母表勸以大義二母感悟雍穆如初表以父死敵場求用爲將領兵五百人傾意結納士皆愛附無難壯士施明盜官物考掠不承權以付表表以誠相感明遂首服且保任之明得不誅後明感恩卒爲善士遷無難右部督封都亭侯以繼舊爵表請讓於修

子延不許領新安都尉料取所賜復入以充部伍在官三年廣  
開降納得兵萬餘人鄱陽民吳遽爲亂表便越境赴討遽敗遂  
降拜偏將軍進封都鄉侯家財盡以養士死之日妻子露立太  
子登爲起屋宅子敖年十七拜別部司馬敖卒修子延復爲司  
馬代敖延子永將軍封侯

三國志  
陳武傳

宋王罕字師言舒州人知宜興縣縣多湖田歲訴水輕重失其  
平罕躬至田處列高下爲圖明年訴牒至按圖示之眾皆服范  
仲淹在潤奏下其式於諸道累遷戶部判官出爲廣東轉運使  
儂智高入寇罕行部在潮遂還惠州簡卒三千方舟建旗順流  
而下將至廣悉眾登岸營於南門智高見有備解去徙知潭州  
爲政務適人情不加威罰有狂婦訴事出言無章卻之則勃罵  
前守每叱逐之罕獨委曲徐問乃夫亡而婦無子妾有子者據

其家而逐婦因憤恚發狂罕爲治其妾反其資婦遂愈郡人傳

爲神明徙知明州以光祿卿卒年八十

宋史王珪傳

王琪字君玉罕從子也兒童時已能爲歌詩起進士調江都主簿上時務十二事仁宗嘉之除館閣校勘集賢校理帝宴太清樓命作山水石歌琪獨蒙褒賞詔通判舒州歲饑奏發廩救民未報先賑以公租守不聽琪挺身任之歷兩浙淮南轉運使修起居注知制誥久之以龍圖閣待制知潤州轉運使徙知江甯府多火災或託以鬼神人不敢救琪召廂邏作賞捕之法得姦人誅之火患遂熄復知制誥加樞密直學士知鄧州徙揚州入判太常寺又出知杭州揚州潤州以禮部侍郎致仕卒琪性孤介不與時合數歷東南名鎮政尚簡靜葬於眞州詔眞揚二州發卒護其窆蓋異數也

宋史王珪傳

張漢卿桐城人監興國軍筦庫與太守論事不合卽和歸去來

辭歸隱三十年後趙汝愚特薦之

萬姓統譜

潘琛宿松人嗜學謁尹焞盡質所疑登紹興進士授廬州司戶

參軍蒞事勤敏升祁門丞教崇禮讓士民化之

江南通志安慶府志

李安仁安慶府人慶元中爲寶豐令軫恤民隱作與士類開渠

以興水利三年之間致民富庶百弛具舉有能聲

一統志河南名宦

元虞執中字伯權望江人至元間進士授將仕郎居官恪謹公

事無滯山南憲府多獎進之

江南通志

明吳善桐城人洪武初官廣平知府上御不嚴善恪修其職帝

悅之惠施百姓政聲焯焯云

江南通志

黃敏字宗學桐城人洪武初歷兵部員外郎奏罷糧運不便者

數事以忤旨左遷上林監丞升長蘆鹽運副使鹽弊肅清有奸

奄私販以事誣敏謫戍興州廷臣交薦復遷工部虞衡司擢廣

西按察副使所至威惠並茂有古憲臣風

江南通志

錢時字時中桐城舉人官刑部主事執法不阿李善長坐胡黨

時白其冤上怒連坐死獄中

江南舊通志

夏儒潛山人刑部主事發奸摘伏如神升福建僉事同邑劉誼

官湖廣道御史不避權貴左遷新淦縣丞興利革弊廉慎之行

始終如一

安慶府志

葛崇潛山人洪武初徵爲都察院檢校升山東道御史出按雲

貴有嚴明之聲凡讞獄必求其情疑獄不輕入時無冤民致仕

歸

萬姓統譜

趙中字允中懷甯人洪武初知萬載縣時紅巾殘毀之後民轉

徙不遑城中不滿百戶中勞來安撫悉復縣郭置七坊廂縣廳



譙樓廟學皆其所建

江西通志  
新增

吳普隆宿松人洪武初官福建左布政創設法制裁決庶務一無所苟而事皆中理旬宣之政至今稱之以疾卒官

江南舊志

劉壽字尙載太湖人洪武閒以貢歷知柳州嘉興甯波西安長沙彰德汀州諸府咸有政績爲政寬厚不施鞭朴其在長沙有不法者反覆勸諭人皆感化去之日父老擁泣爭挽其舟官終雲南參政柳州長沙皆立祠祀之

一統志湖  
南名宦

呂衡字仕平太湖人洪武閒以貢薦授監察御史遇事敢言奉詔之陝西體察機務還奏稱旨巡按陝西風裁甚著貪墨皆望風解綬去其孫讚字廷揚成化丙戌進士知新城縣剛介精敏豪右斂跡升戶部主事

江南通志  
安慶府志

羅彥章望江人洪武中知寶慶府有善政

楚紀

劉瑩字仲瑀桐城人永樂癸未進士官御史歷永平廣平二郡

守爲政平易人歌曰太守政平二郡皆甯

江南通志

陳務本字立卿桐城人永樂閒官武昌同知除五蠹創十利又捐資修黃鶴樓祿入爲盡泊如也同邑許友進官御史以直聲

顯忤中貴指遂告歸

江南舊通志  
安慶府志

孫源潛山人永樂初官御史性剛介以言事忤旨出爲重慶府推官有政聲同邑方復字誠軒永樂壬辰進士入翰林侍宸翰

文采奕奕名重一時

安慶府志

鄧恂宿松人永樂閒知葉縣公勤廉恕民戴之如父母以艱去詣當道乞奪情者數百人服闋除內鄉地辟山險恂興學校平獄訟勸輸將無一不盡其誠民成德之子義以舉人任石首松陽汝陽教諭訓誨有方致仕家居以風教自任

安慶府志

饒政字文質望江人永樂乙未進士運糧江西既竣役同事十  
三人分別授御史僉事政上章請授教職詔可先後四任學博  
凡二十年所造就皆一時名臣其在德安教有成規雖祁寒盛  
暑不輟

一統志湖  
北名宦

裘賢安慶人宣德五年官湖州通判爲政公勤愛民如子公退  
則杜門以絕私謁嘗出勸農釋冠帶執農具以耕其妻饁之比  
年大熟人皆以爲勸農所致後卒於官士民哀之

廣東通志  
新增

凌昌楫松人官江西布政司理問詳讞疑獄出人意見擢御史  
剛正不阿歷大理寺副明慎剖決獄無畱滯致仕歸家居十餘  
年未嘗一至公門

安慶  
府志

吳昇字亨晦懷甯人宣德癸丑進士擢工科給事中遇事敢言  
正統時廷議郡縣守令用大臣薦昇謂受官公朝拜恩私室不

可又議大臣舉御史昇謂御史既被大臣舉則大臣有不法御史恐不肯背私恩而抗公言咸奏止之閩浙礦徒爲亂勢甚熾擢昇浙江參議督兵往緝至則捕斬渠魁撲其黨廉失機都指揮以下數人奏置之法眾乃股栗不二載賊屏息後致仕歸一統志

程旼字太和桐城舉人官磁州同知時蝗蝻大發旼潛禱於神忽禿鶩飛集啄蝗殆盡改滄州值旱旼禱五龍井有白魚五出見雨大注歲大稔民立五龍廟肖像祀之江南通志

畢麟字文祥太湖歲貢官新樂訓導邊寇犯境有司竄匿麟率士民立寨禦之升知阜平縣有能聲安慶府志

謝佑字廷佐桐城人正統丙辰進士歷任部曹奉敕督山西邊儲接濟大同宣府天順戊寅升山西右布政凡所設施務使民

沾實惠致仕歸臨卒母喪未終遺言衰經爲斂死不忘親也

山西

通志 江  
南通志

錢道甯望江人正統閒以貢官福建順昌知縣造舟梁雙峯驛

前以濟民時巨寇鄧茂七來攻道甯率士民保境屢戰卻賊當

道上其功命未下已先卒邑人立廟祀之

福建通志  
安慶府志

何永康字伯徵望江選貢歷官新建縣邑苦旱永康勘度地勢

築隄堵水歲獲豐登民懷其德建祠祀之

安慶府志

程翰字鵬舉望江人正統閒官湖廣會同知縣在任六年百廢

具舉峒苗不靖翰率民兵討平之奏績於朝敕賜六品俸卒於

官民立像祀之

湖南通志

韓隆字德崇桐城人景泰閒官永安知縣邑患虎隆禱於神虎

遂去永安初置隆盡心民事築城建學公署壇壝一一創作辨

疑獄嚴治盜賊民咸德焉秩滿百姓乞畱復任至今祠祀之

福建

通志 安慶府志

李進宿松人官御史正色立朝羣小側目同邑萬鍾官湖廣布

政司都事從征苗峒有功

安慶府志

姚旭字景陽桐城人景泰辛未進士官刑部給事中敷奏詳明直聲大著謫判鄭州清慎自勵擢南安知府盡心民事尤以學校爲先雨暘愆期有禱輒應地產嘉禾民歌頌之官終雲南參

政

江南通志

王相字廷相桐城舉人官兗州府通判董馬政馬大蕃息致政歸陳獻章爲桐鄉深處記以贈之

陳白沙集

章綸桐城人景泰中以給事中謫應州判擢升本州洞達治理案無畱贖明練仁恕有功地方歷官參政

山西通志

戴貴潛山人景泰間知四川井研縣井研素稱難治貴以廉介

特稱致仕歸足跡不履公府

安慶府志

方佑字廷輔桐城人天順丁丑進士擢御史巡按畿輔錦衣官校憚其風裁爲斂戢有盜殺縣簿弗獲佑以計襲而誅之移巡蘇浙鹽政一洗宿弊再按廣西蠻逼桂林城中兵少佑令兵出東門入南門負甲易械如是數四蠻相顧錯愕遂遞巡撫吳楨隱匿軍情佑劾罷之風采益著成化初以忤中貴廷杖終桂林

知府

一統志

黃憲字景章桐城人天順丁丑進士知登州登治瀕海收受山東各處糧草轉給遼陽吏胥因緣爲奸憲革其弊諸郡頌之

安慶府志

府志

蕭珍字廷玉桐城人官易州馬政判官牧地有占於豪右者清

還馬戶馬大蕃息上官賢之

安慶府志

葉華字廷輝懷甯人天順丁丑進士官山東沂州知州沂苦道賦疲於轉輸華區畫得宜民賴其惠武弁侵暴抗疏裁抑以勞

卒官民立祠祀之

安慶府志

邱甯字士安桐城人天順閒爲鎮南衛經歷衛有兩山舊產礬歲賦二萬有奇後礬盡民市別郡以償甯繕疏奏免邑人德之

安慶府志

王道字懿德潛山舉人官杭州通判廉恪敏斷威惠並行以事忤直指使者挂冠歸直指檢其舟中惟敝篋盛書數卷乃慚謝家居二十年著書講學足跡不入公門有盜入其廬曰吾借炊耳知公廉吏無他求也

江南通志

劉永太湖人成化中官會同縣丞以廉能著升爲令益勵廉隅



精聽斷久而不懈

湖南通志

李璉字純夫懷甯人成化己丑進士知蘭谿縣剛介有爲治行大著建景賢祠祀邑之鄉先生暨名宦又重建悅濟浮橋以便利涉升太僕丞遷贛州知府水疫繼作璉拯之惟恐不及閩寇犯境率民兵連擊敗之事平詔逮失事諸郡守璉僅以功免

浙江西名宦

浙江通志

王瑞字良璧望江人成化己丑進士授吏科給事中倜儻敢言嘗於文華殿抗言內寵滋甚上震怒瑞無懼色湖廣江西撫按官因災傷請免有司朝覲瑞言歲祲民困由有司不職正當加罪乃爲請留則人才進退何由得辨是朝覲考察兩大典皆從此廢帝卽命吏部禁之晉都給事中疏言今倖門大開鬻販如市乞天順冒功者一切革除斷自宸衷以存國體帝得疏意動

越三日貶李孜省凌中等四人秩奪黃謙錢通等九人官人心

快之瑞居諫垣十餘年遷湖廣右參議謝病歸卒

明史本傳

江宏濟字本深桐城人成化丙戌進士知清豐縣公廉明恕甚  
得人心擢監察御史常云御史紀綱所係糾察在當人心論諫  
在識大體尋按長蘆及雲南風裁凜然不避權貴以疾卒官筭

中惟敝衣數襲僚友贖金助之槩始得歸

安慶府志

柯忠字汝節懷甯人成化乙未進士知鞏縣有善政擢監察御  
史歷陝西按察司副使居官抗直敢言不肯俯仰時貴政譽赫

然

安慶府志

方向字與義桐城人成化辛丑進士擢南戶部給事中宏治初  
疏劾大學士劉吉依附固寵徐溥巧圖進用尚書周洪謨善逢  
迎而詆宦官陳祖生輩尤力竟爲所陷下獄謫雲南多羅驛丞

後升安陸州居官廉儉遇事剛斷敏達再升瓊州知府歲旱徒

步禱雨立應瓊池產珠將歸僕私市一珠既渡海覺之索而投

之於海曰毋以而珠喪吾珠也

一統志湖北名宦 江南通志

高昇字啟明潛山人以貢判廉州攝郡篆廉惠並至苗眾倡亂

昇單騎入其營諭以威德苗皆感泣就撫事聞錫銀牌以旌告

歸卒後敘平苗功贈奉議大夫

安慶府志

戴恩字天錫潛山人成化丁未進士授工部主事權稅蕪湖積

羨悉輸於公轉禮部郎出知桂林府釋誣盜之冤全活者十餘

命以忤逆瑾致仕歸卒年八十二

安慶府志

丁榮字宗仁懷甯人成化丁未進士官行人出使河南中道疾

劇同使勸之歸榮謝曰君命何可違竟卒於衛輝榮性孝友居

父喪寢苦塊者三年待異母弟恩勤有加

安慶府志

余順字天順懷甯人成化乙未進士知浙江安吉州政有便於民者攘臂為之略不辭難創學建廩鋤強恤貧以剛直忤當道謫戍遼東後放歸

分省人物考 浙江通志

方印字與信桐城舉人知天台縣潔己愛民勸農興學闔邑利弊靡不興革未周歲教化大行卒於官囊僅入銖小民罷市相弔僚吏醜資為斂舊有司櫬不出中門父老號泣捧之而出咸

肖像建祠祀之

浙江通志

王瑀字良珮望江人成化丁未進士知濰縣政尚廉平升濟甯州益以清慎著聞晉守大明府命方下卒於官

安慶府志

胡宏仁字德恢望江舉人知江西龍南縣為政嚴明不避權貴士民仰其清操有只飲龍江一口水之謠卒於官櫬歸士民攀

舟泣送

安慶府志

雷宗字希曾桐城人宏治壬戌進士知汝陽縣有善政擢監察御史正德時征霸州劇賊奉命監軍疏戎情振頽紀風裁凜然以功爲同事所忌被誣逮問謫瀏陽典史轉知崞縣卽告歸卒年八十四

江南通志

丁楷字汝正懷甯人宏治己未進士知金谿縣以廉能著擢監察御史出按廣東風裁赫然論劾不避權貴卒於官藩臬往視其斂見囊橐蕭然咸歎息爲真御史

江南通志

劉溥字公濟懷甯人宏治庚戌進士授翰林院檢討坐事除名以薦起歷麻城知縣麻多豪右溥開誠布公除強抑暴民樂其治而大猾皆病之然眾謂麻城有賢令自溥始

安慶府志

蕭世賢字若愚桐城人宏治乙丑進士官刑部郎中執法不撓豪強憚之治濠彬巨獄平反株連全活甚眾出守嘉興歲革羨

金千餘兩減織造樣絹三百餘匹立三館以造士治行第一擢

湖廣副使未至中道卒嘉人爲立遺愛碑

一統志浙江名宦

李楫字濟之懷甯人宏治乙丑進士纂修孝廟實錄授南昌推官以明允稱擢監察御史出按山西搜剔宿弊忤當道謫判沔陽移泰和令從王守仁平逆濠歷遷貴州參議時芒部弗緝楫贊臺臣往征之賊平錄功尋乞歸

明史王守仁傳江南通志

段恢字汝寵懷甯舉人中乙科授裕州學正能以恩義結諸生裕士子戴之如父恢以此愈自勵勤者誘惰者勸士風丕然一

變

安慶府志

王材字天成望江人宏治壬戌進士知龍游縣民有爭墓成大獄材令各具志銘來及發石罪其不合者一邑驚服改昌平升

戶部主事終廣西平樂知府

安慶府志

錢如京字公溥桐城人宏治壬戌進士正德中以御史按畿輔  
后父慶陽伯夏儒乞清河地三千三百頃如京勘之言清河止  
德府退地七百頃足以畀儒他皆民產不當畀詔遣中官史宣  
崔通織造南方劉允迎佛烏斯藏皆與同官力諫累擢至都御  
史巡撫保定等府歲餼請發內帑數萬緡賑之轉兵部侍郎提  
督兩廣軍務所轄土官多相仇殺當事者利用兵以希功賞如  
京不可疏請褫土官職許立功自贖晉刑部尙書卒贈太子少

保賜祭葬

一統志  
萬姓統譜

李涪字元樸太湖人宏治壬戌進士任行人擢刑科給事中  
以忤逆瑾轉浙江按察僉事浙東盜起涪督兵剿捕會有星變出  
揚州分涪曰杭必有災令民開儲水以備已而杭城火得無患  
調廣西按察使值撫江土搖與苗民讐殺涪討平之臺臣薦於

上命未下而溘卒

江南通志

余珊字德輝桐城人正德戊辰進士授行人擢御史乾清宮災疏陳弊政極指義子西僧之謬巡鹽長蘆疏陳竈丁及民戶困乞蠲逋寬政帝從之尋以發中官奸利事爲所誣下獄謫官嘉靖初擢江西僉事討平梅花峒賊遷四川副使應詔陳十漸疏反覆萬四千言語極愷切以艱歸士民祀之名宦服闋以故官

蒞廣東終四川按察使

明史本傳

齊之鸞字瑞卿桐城人正德辛未進士改庶吉士授刑科給事中帝將置肆於京城西偏之鸞極言不可應州奏捷帝降敕稱總督軍務威武大將軍總兵官朱壽剿寇有功特加公爵舉朝大駭之鸞上疏切諫及將南巡復偕同官交章力諫不報更伏闕俟命乃止不行宸濠反張忠許泰等南征命之鸞從軍紀功



力白王守仁誣忠泰株引無辜多所開釋世宗時大計京官被  
中傷謫崇德丞屢遷甯夏僉事饑民採蓬子爲食爲取二封進  
於帝且以貽閣臣請賑歷河南山東副使召爲順天府丞未行  
盜發畱鎮撫尋擢河南按察使卒於官

明史本傳

潘洪桐城人正德閒以薦授山東按察司僉事居官明敏不避  
權豪郡邑饋遺悉峻卻不受尋以忤要津罷歸

安慶府志

朱詔字栗菴潛山貢生任開封訓導武宗南幸詔上書請回鑾  
以安社稷正君位慰生靈帝覽曰眞狂書生也升廣東清遠縣

教諭

安慶府志

章諍太湖舉人正德中知甯海州土寇方熾修城濬池演武備  
以待之寇薄城下焚東門指揮王瀛欲棄城走諍按劍叱之眾  
心遂定督兵奮擊賊遁去調全州和平無擾民皆安業尤得士

心轉廉州府同知山谷細民爭持雞米求見哭送者塞途入爲

應天府治中卒

一統志山東名  
廣西通志

程亨字彥達懷甯人天順末官監察御史按河南持憲得體升

江西按察司僉事分巡南贛盜熾身櫻鎗鎖奮擊搗其穴剿之

奉敕視學品士不爽致仕歸行李蕭然

安慶府志

吳檄字用宣桐城人正德辛巳進士授襄陽推官決獄賑饑綽  
有能聲遷兵部武選郎中有都督僉事姜奭奏邊功乞升職方  
下武選議官檄曰法斬首二百上者升一級奭未滿八十當賞  
不當升劉民譽者其父從世宗起興藩賜錦衣衛指揮希襲職  
大司馬張纘欲與之檄不肯纘自爲劄請詔不許檄亦以是外  
補耿介之操始終如一

江南通志

汪漢字淵之懷甯人嘉靖癸未進士授南戶部主事歷工部都

水郎中刷剔弊蠹節省浮費出知永州府犛獠構亂請兵征之  
事將戢以疾歸歿後論功蒙鏹幣之賜

安慶府志

楊春芳宿松人嘉靖丙戌進士授行人選御史巡按貴州十五年平浪叛苗攻奪鎧口聖春芳遣參將李佑等撫諭之賊執佑等爲質乞還土田官印春芳以聞命調軍三萬攻之不克復調

宣撫安萬銓合剿乃殲其酋王聰王佑等捷聞敘功賞賚有差

春芳有政事才後巡按陝西河南皆有功績

明史貴州土司傳 宿松縣志

方克字惟力桐城人嘉靖丙戌進士歷知貴溪桐鄉二縣有賢聲擢南監察御史中官邱得守備南京專恣不法請益額外兵餉克抗疏劾之先是克仲父以劾中貴得罪人咸危之克曰吾得紹武前人罪且甘之詔革兵餉謫得戍孝陵克性孝友撫姪

如子歷官苑馬寺少卿致仕

安慶府志

徐桂字子芳潛山人嘉靖乙未進士歷官員外郎讞獄摘伏多所平反擢知鄖陽府有妖僧緣術爲奸婦女佞佛入寺者輒墮其術中桂得其情親詣寺縛主僧勘問遂置之法焚其寺數十年不破之巫風一日盡革

江南通志

齊傑字士庸桐城人嘉靖辛丑進士官南刑部主事有同年生屬所知諷之將爲之地傑曰丈夫拜爵公朝而乞恩私室乎拒不許出知贛州清廉勤慎克稱其職

安慶府志

盛汝謙字亨甫桐城人嘉靖辛丑進士授行人擢御史按關中歲饑民嘯聚爲寇汝謙設糜賑之計擒倡亂者數人餘黨遂解遷光祿卿嚴嵩柄國汝謙守正不阿尋乞歸嵩敗出爲南太僕卿駐滁州與滁士講學延師教其子弟之貧者擢操江僉都御史南京貢院號故用蘆葦捐俸修拓甃以甄轉戶部侍郎致仕

歸桐故無城倡議築之後流賊亂桐得保全汝謙之力也桐人

祀之

江南通志

阮鶚字應薦桐城人嘉靖甲辰進士歷官監察御史爲浙江提學副使得人稱盛浙方苦倭寇撫官檄諸司畫地防守鶚分守武林門列營關外令士女分道入城得免追迫蹂躪之苦擢僉都御史巡撫浙江賊多方攻擊鶚隨機應之與胡宗憲相犄角以計縛其渠魁斬獲殆盡自是兩浙始得休息民思其德相與立祠

一統志浙江名宦  
明史胡宗憲傳

戴完字仲修桐城人嘉靖甲辰進士官戶部主事分司德州改刑部郎嚴嵩用事冀其私謁竟不往會張紳上疏劾嵩杖戍夜郎嵩偵其疏與完合草出補貴州僉事時盜賊屢發土官跋尾完杖之而以恩撫其子民皆畏服在任三月威德大著

江南通志

蔣建字舒江懷甯舉人知建昌縣守官清慎遷饒州府同知饒  
有盜窳權要購求無已建一切禁罷清軍弭盜幹濟有聲饒民  
德之立祠祀焉

安慶府志

趙鈇字鼎卿桐城人嘉靖甲辰進士歷官給事中仇鸞占役軍  
卒鈇疏爭之勒士歸伍遷太僕寺少卿駐滁州苦旱鈇以身禱  
雨立注又捐俸修書院學者興起累官僉都御史巡撫貴州值  
土舍韓甸擾司印糾黨稱兵三省騷動鈇督總兵等官會剿爲  
黔奏便宜六事皆議行焉又教民引水爲田黔知水耕自鈇始

江南通志

程倫字秉彝太湖舉人知開化縣存心正大民無私謁屏除奸  
弊修舉廢墜尤加意學校治行爲東浙先

浙江通志

方舟字雙桐太湖人以貢判兗州有賢聲魯藩重之稱先生而

不名治河有功賜銀幣同邑彭楫字平川以貢官汝甯教授清

望著聞署鄆陵令有惠政

安慶府志

雷汧太湖貢生知景甯縣常祿外不妄取一物歷官三載積俸百餘金悉爲其邑置田以養老者同邑劉綱字克用以貢官建

甯推官亦以明威稱

安慶府志

宋鏞字廷器太湖舉人官彰德通判外艱歸服除補襄陽催科不擾屢署州縣事吏民懷之子大章字堯音亦以舉人知永福

縣有廉能聲奉委卒於建甯行笥蕭然當道厚爲之賻

安慶府志

於惟一字德夫懷甯人嘉靖癸丑進士官南工部主事巡視至

水關上所寵方士陶真人欲夜從關出惟一繫其舟吳時來參

嚴嵩被謫出都惟一祖餞泣別嵩銜之出守太原歲饑請賑不

待報可徑發倉廩全活甚多擢陝西副使去之日民遮道泣送

一統志山  
西名宦

金燕字尙賓潛山人嘉靖癸丑進士知桐鄉縣時海寇猖獗桐鄉濱海無城燕卽日營築城完而寇至環攻四十餘日寇遜設奇追殲之擢禮科給事中嚴嵩柄國燕疏詆其奸謫判彛陵後爲尙寶丞

浙江通志

林有望字末軒桐城人嘉靖癸丑進士歷官四川兵備時嚴嵩擅權抗疏者三遂乞歸瀘州有羨餘銀十萬兩還貯庫內歸之日囊無餘資

安慶府志

吳宗周字文甫懷甯人嘉靖丙辰進士授黃州推官執法平允方士陶仲文以左道蠱上大吏皆嚴事之宗周不爲禮且拒其請遷漢陽值景王之國下令稅民田宗周持不可上書悟王事得寢以疾歸起戶部主事拜命而卒黃人祀之學漢陽人肖像



祀焉

江南舊通志

吳一介字元石桐城人嘉靖丙辰進士知光州光胥吏多貴家奴善持短長一介至無敢訛法者擢屯田員外郎修洪應樂城二殿造景王陵城廣渠門諸中人所奇貨視者罔敢濫冒擢江西副使備兵湖西會廣東峒賊下豹等屠電白移節監南越軍破擒豹降其卒數萬進河南右布政使

江南舊通志

阮自嵩字思竹桐城人嘉靖丙辰進士官刑部執法不徇屢觸權要嚴嵩父子銜之謫判沔陽以官銀抵逋負脫二百餘人於獄景藩闖豎侵奪民田嵩繩以法致干參奏世宗原其無罪再判濮州均治河苦役小民戴之後復忤當軸以滄州守歸

江南通志

張科字子漸太湖人嘉靖辛丑進士授刑部主事齡達不立崖岸歷官刑部郎居官十載清白如一日

安慶府志

吳自峒字石蘭檄之子也嘉靖壬戌進士授行人以清望選翰林待詔充裕王講官正色開陳多所裨益穆宗卽位以青宮舊恩攝尙寶卿歷太常寺卿自峒素與張居正善及居正秉政無一字相通轉南右通政旋告歸

江南通志

趙書字同文桐城人嘉靖末以歲貢爲平湖教諭勤於課士諸

生貧者典衣周之嘗作明倫十二事以爲訓學使者聞而褒賚卽以所資鑄鼎學宮爲銘以見志云

浙江通志

李彥字龍陽望江舉人官台州通判歲饑典賑全活數萬人窮民鬻妻輸稅彥爲贖還之有以孝聞者三式其廬擢漢中守鳳邑賦失均彥履畝圭度除荒糧五百石有奇漢沔諸水可資農彥爲修堰導郡城外四十里古溝民用大穰

江南通志  
安慶府志

程光甸字子極太湖人嘉靖己未進士知進賢縣歲旱民饑光

甸移家穀千石賑之轉工部主事士民思之請祀名宦

江南通志

石渠字絅齊宿松人官山東德平簿有政聲委監三州二十四

縣稅悉辨理遷廣東按察司都事承推疑獄多所平反升安遠

知縣地鄰甌越化頑梗凋難民表幽節舉逸行賑凶荒以慤直

解組歸邑人祀之名宦

安慶府志

何思菴字子樞桐城人以貢知棲霞縣縣爲海墻瘠地賦恆不

及額思菴勸農予耕具免其口賦所輸視曩數倍富民誣殺人

吏謂宜遠嫌竟奏當城旦倭震於鄰大吏下防禦十策費且擾

力持不可邑亦安堵解組歸民擁哭幾不得前以子如寵貴贈

戶部尙書武英殿大學士

安慶府志

周點字與吾望江舉人知浦江縣多惠政士歌民服作祠祀之

江南通志

安慶府志

吳肇東字敬堂太湖人隆慶戊辰進士授戶部主事出權臨清鈔關有贏金一萬三千悉輸入庫出知桂林府愛民如子犛獠頑梗者咸稽顙庭下擢福建按察使將晉浙撫張居正奪情官閩者皆弔唁肇東獨不遣使往因謫長沙遂歸

江南通志  
安慶府志